



Najaaraq Møller
Inatsisartunut ilaasortaq, Siumut

**§ 37 nr. 036/2024 naapertorlugu naqinnernik ilisarsisinnaangitsunut
misiligummut apeqquteqaatinnut akissuteqaatit**

22-02-2024
Sagsnr. 2024 - 1966
Akt nr. 23894899

Postboks 1029
3900 Nuuk
Tlf: +299 34 50 00
Email: ikin@nanoq.gl
www.nanoq.gl

Asasara Najaaraq Møller,

Qujanaq Inatsisartut suleriaasianni aalajangersakkat tunngavigalugit apeqquteqaatinnut.
Taakkua uani ataani akissuteqarfigaakka.

***Apeqqut 1: Naqinnernik ilisarinnissinnaangitsuunermut naqissusiinissamut
kalaallisut oqaasertalersukkamik misissuutiliornermut suliaqartorneqarnermoq
Naalakkersuisunit ilisimasaqarnerpat?***

Akissut: Naalakkersuisut massakkorpiaq ilisimasaqanngillat naqinnernik
ilisarsisinnaangitsunut misiligusiortoqarnermoq.

Inatsisartut 2021-p ukiaani ataatsimiinnerminni aalajangerpaat naqinnernik
ilisarsisinnaangitsunut kalaallisuumik misiligusiortoqarnissaanut periarfissanik
qulaajaasoqassasoq (UKA 2021/73). Taanna suliaq nuna tamakkerlugu iliuusissatut
pilersaarusiarnut ilanngunneqassaaq (UKA 2021/29). Iliuusissap suliarineqarnera
Ilinniartitaanermut Aqutsisoqarfimmut pituttorsimavoq.

2023-p ukiaani Ilinniartitaanermut Aqutsisoqarfiup suliamut sinaakkutitut siunnersuutaa
(kommissoria) Ilinniartitaanermut, Kultureqarnermut, Timersornermut Ilageeqarnermullu
Naalakkersuisoqarfimmit aamma Styregruppemit akuerineqarpoq sulinerlu ilaatigut
aallartippoq projektgruppet aallartinnerisigut.

Qulaajaanerup takutissavaa, suliap annertussusissaa, tassunga ilaalluni
misiligusiortoqarsinnaanernut periarfissaqarpat misiligusiornissap sivisussusissaa,
kikkut misissuisinnaanissaannut siunnersuutit aamma qaqugu atuutilersinneqarnissaanut
siammaananeqarnissaanullu siunnersuutit, kiisalu aningaasartuutissanut missingersuutit.

a. Taamaappat, misissuut qaqugu naammassilluni atornerqarsinnaalissava?

Akissut: Ilinniartitaanermut Aqutsisoqarfimmit nuna tamakkerlugu iliuusissaq
inassuteqaatinik imalik 2024-p naalernerani politikkikut akuerineqartussanngorlugu
tunniunneqartussatut naatsorsuutigineqarpoq. Taamaattumik UKA2021/29, 47 aamma
73 ataatsimut oqallisigineqarnerini malugeqquneqarpoq nuna tamakkerlugu iliuusissap
piareernissaanut politikikkut ulluliisoqanngimmat.

Iluusissap ersersissavaa misiligusiortoqassappat taassuma naammassilluni atuutilernissaanut siunnersuut. Kultureqarnermut, Ilinniartitaanermut Iisimatusarnermut Ilageeqarnermullu Ataatsimiitsitaliaq isumaliutissiissummi UKA2021/29, 47 aamma 73-imi isumaqarpoq, misiligusiorneq nukinginnaraluartoq suliamik ilisimasaqarluarnermik aammalu suliarilluakkamik tunngaveqarluni suliarineqarnissaa pingaarnerpaasoq.

b. Misissuutiliorneq qanoq suliarineqarpa?

Akissut: Nunat tamalaat akornanni naqinnernik ilisarsisinnaanngitsuunermut tamanut atuuttumik misiliguteqanngilaq. Taamaattumik misiligusiornermut aalajangersimaqqissaartumik malitassaqanngilaq. Nunat ataasiakkaat nunami oqaatsit atuuttut aamma allattaaseq atuuttoq aallaavigalugit namminneq aalajangertarpaat, suut naqinnernik ilisarsisinnaanngitsuunermut tunngaviussanersut. Tunngaviit ilaatigut allassinnaanermi atuarsinnaanermilu misissuinermit, atuarsinnaanermut allassinnaanermullu naleqqiiffinit aamma allannikkut atuarnikkullu ajornartorsiutigineqartartunit aallaaveqarsinnaasarput. Taakku ilaatigut misiligusiornermi tunaartaasinnaasarput.

i. Naqqaneerpiaq suliaq suliarineqarpa? Imaluunniit pioreersumit kalaallisuumut nutserlugu suliarineqarpa?

Akissut: Misiligutip tutsuiginassuseqarnissaa tunngavigalugu pioreersunik nutseraluni atoqqiisoqannginnissaa pinaveersaartinniarnegartarpoq. Tassa oqaatsimit oqaatsimut allattaatsit assigiinngilluinnarsinnaasarmata. Taamaattumik kalaallisut oqaasertalimmik misiligummik ineriartortitsisoqassappat naqqaniit ineriartortitsisoqassaaq.

ii. Naqqaneerpiaq suliarineqarsimassappat, taamatut sulineq sumik tunngaveqarpa?

Akissut: Naqinnernik ilisarsisinnaanngitsut nipisiuinarnermik ajornartorsiuteqartuupput. Nipisiuinikkut ilikkaruminaatsinneqartartut tassaapput allattaatsip tunngavii. Taamaattumik allatut allattaasillit misiligutaat toqqaannaq atorneqarsinnaanngillat. Assersuutigalugu qallunaat allattaasiat "itisuujuvoq" (ikke lydret), tassa niperpassuit oqalunnikkut ersinngeriarlutik allatanngoraangamik aatsaat ersertarput assersuutigalugu (h)vad. Kalaallit allattaasiat oqitsuuvoq (lydret), tassa oqalunnikkut nipit maliinnarlugit oqaatsit allatanngortinneqarsinnaagamik. Taamaattorli kalaallit oqaasii takisoorujussuusinnaasarput, taakkulu atuarniarnikkut allanniarnikkullu ajornartorsiutilinnut sapernartuupput. Taamaattumik assersuutigalugu qallunaatut oqaasillit kalaallisullu oqaasillit atuarniarnikkut ajornartitaat assigiinngitsuusinnaallutik.

Misiligutip tutsuiginassuseqarnissaanut ilisimatusarnikkut suleriutsit atorneqakkajupput. Uku assersuutaasinnaapput:

- Kikkut atuisuussanersut aalajangerneqartarput, assersuutigalugu Ilitsoqqussaralugu oqaasillit nalinginnaasumillu atuarnermik allannermillu atuartaasimasut.
- Misiligutip imarisassaa, ilusissaa, sapernassusissaalu suullu uuttuiffigineqassanersut aalajangersorneqartarput.
- Misiligummi oqaatsit ataasiakkaat uuttuinersut misissorluarneqarput.

- Misiligutip imarisaa ataatsimut isigalugu ataqatigiinnersoq uuttuinersorlu kisitsisitigut qulakkeerneqartarpoq.

Taakku ingerlannerini atuisunut misileraatigineqartarput. Tamakkua qulakkeereeraanni aatsaat atuisunut nutaanut atuarsinnaassutsimut naleqqussaalluni misileraasoqartarpoq. Taakku aallaavigalugit killiliussisoqartarpoq, taamaalilluni misilitsinnermi angusat aallaavigalugit takuneqarsinnaalersarpoq naqinnernik ilisarsisinnaanngitsuunersoq imalt. naamik.

c. Kikkut misissuisinnaatitaajumaarpat?

Akissut: Nuna tamakkerlugu iliuusissap inassuteqaatai aallaaviussapput. Nalinginnaasumik atuarnermut siunnersortitut ilinniarsimasut misiliinermik ingerlatsisuusarput.

d. Nuna tamakkerlugu siaruarnissaanut qanoq suliniuteqartoqarpa?

Akissut: Iliuusissaq nuna tamakkerlugu atuuttussatut suliarineqarpoq. Nuna tamakkerlugu iliuusissami siunnersuutit meeqqani, inuusuttuni inersimasunilu naqinnernik ilisarsisinnaannginneq aamma atuarnermik allannermillu ajornartorsiuteqarneq ikiorsiiviginiarlugit nunamut tamarmut atuutissasut. Tassani aamma ilaassapput kalaallisut oqaasertalimmik misiligusiornissamut periarfissat.

e. Misissuutip ineriartortinneqarnera ingerlanneqanngippat, suna tunngaviaa taamatut suliaqartoqannginneranut?

Akissut: Kalaallit Nunaanni atuarsinnaanermut, pingaartumillu naqinnernik ilisarsisinnaanngitsuunermut ilisimasat killilerujussuupput, taamaattumillu immikkut ilinniarsimasoqanngilaq, soorlu atuarsinnaanermut ilisimatuunik, siunnersortinik il.il. Taamattaq atuarsinnaassutsimut allassinnaassutsimullu paasissutissat misiligusiornissamut tunngavileeqataasinnaasut killeqartorujussuupput. Misissuinissamut aamma ineriartortitsinissamut aamma suli aningaasaliissuteqartoqanngilaq.

Nangillugu naqinnernik ilisarsisinnaannginnermut misiligummik inerisaassagaanni pisariaqarpoq, paaseqqissaassallugu misiligut taamaattoq sumut atorneqassanersoq, aamma meeqqanut, inuusuttunut inersimasunullu ataasiakkaanut tunngatillugu paasisaasut sumut atorneqarniarnersut. Tamanna massakkumut kalaallisut oqaasertalimmik naqinnernik ilisarsisinnaannginnermut misiligummut tunngatillugu erseqqissarneqanngilaq.

Apeqqut 2: Meeqqat atuarianni 1.-3. Klassemi atuartunut screenerisinaalernermit suliaq Naalakkersuisut sumut killinnersoq oqaluttuari-sinnaavaat? Siunniussallu suuppat?

Akissut: 2020 naalersoq misiligutit siusissukkut pasitsaassiniutitut atorneqartussat tamanut atorneqarsinnaasunngorlugit saqqummersinneqarput. 2023-mi upernaakkut misiligutit nuna tamakkerlugu siammaanneqarlutik aallartipput. Siammaassineq 2024-mi naammassissaaq. Siammaanermi inuit ilisimasallit 147-ut, taakkunani nukarlerni kalaallisoortitsisut, trinlederit, fagvejlederit, læsevejlederit, atualertussanut immikkullu

atuartitsinermit siunnersortit kiisalu MISI-mi sulisut Ilinniartitaanermut Aqutsisoqarfiup pikkorissaanerini peqataasimapput. Siusissukkut pasitsaassiniutinik siammaanerup nanginnera kommunitun tunniunneqarumaarpoq.

Apeqqu 3: Naqinnernik ilisarinnissinnaanngitsunut misissuutiliornermut maannamut aningaasat qassit atorneqalereersimalerpat?

Akissut: Naqinnernik ilisarsisinnaanngitsunut misiligusiortoqarnikuunngimmat una apeqqu Naalackersuisut akisinnaanngilaat, massakkumullu inerisaanissamut aningaasaliisoqarnikuunani. Misiligummik inerisaanissamut siunnersuuteqartoqassappat projektgruppi misissuinerisa takutissavaat qanoq annertutigisumik aningaasaliisoqartariaqassanersoq. Misiligummik sananissamut periarfissat qulaajaanerup, nuna tamakkerlugu iliuusissami ilaasussa, ilaatigut misiligummik ineriartortitsinermit aningaasartuutissat ilanngunneqassapput.

Apeqqu 4: Kalaallisut naqinnernik ilisarinnissinnaanngitsunik misissuutiliorneq katillugu tamarmi qanoq akeqarpa?

Akissut: Apeqqu 3-mut akissut takuuk.

Ukiut pingasut atorlugit misiligummik ineriartortitsisoqassappat inuit ilisimasallit siunnersuisussat, sulisussat, misileraanerit, ilitseruusiomerit kiisalu siammaannissaanut minnerpaamik 10. mio. koruunit akeqassat Ilinniartitaanermut Aqutsisoqarfiup missiliorpaa. Tassunga ilaangillat inuit ilisimasalinnut ilinniartitseqqiinerit aammalu misiligut ilusissaa, soorlu misiligut digitaliuassappat.

Apeqqu 5: Atuarfimmil naammagisimaarinninnermut ilinniarsinnaassutsimullu qulakkeerniarlugu sakkusannik piareersaasiortoqarpa?

Akissut: Ilinniartitaanermut Aqutsisoqarfik atuartunut immikkut pisariaqartitsisunut digitaliusumik katalogiussalluni pilersaaruteqarpoq. Katalogi ikiorsiissutaasannaasunik imaqassaaq atuartitsisorlu atuartunut ataasiakkaanut tulluarsakkamik IT-imik sakkuusivimmik sanasinnaanngussalluni. IT-imik sakkuusivik atuartunut immikkut atuarinneqartunut taavalu atuartunut nalinginnaasumik klassimiittunut immikkut pisariaqartitsisunut tulluarsagaassaaq. Katalogi piareerpat Ilinniartitaanermut Aqutsisoqarfiup nittartagaani iserasuaat.gl-imi saqqummiunneqassaaq.

Naalackersuisut Attassiinnarnissamut Siuariartornissamullu pilersaarutaanni 2-mi meeqqat atuarfiat pillugu anguniakkat suliniutillu Naalackersuisut ilinniartitaanikkut periusiissaanni suli erseqqissarnerussapput. Tassunga ilanngullugu meeqqat atuarfiannut tunngatillugu naatsorsuutigineqarpoq ilaatigut meeqqat atuarfianni atugarissaarnerulerneq sammeneqassasoq.

a. Taamaanngippat, sanasoqarpa? Sanasoqassava?

Akissut: Apeqqu 5-imut akissut takuuk.


b. Qanoq akeqarpa?

Akissut: Aningaasartuutissat suli missiliorneqanngillat.

c. Taamaappat, ilinniartitsisunik pikkorissaasoqarnikuua?

Akissut: Apeqqut 5-imut akissut takuuk.

Inussiarnersumik inuulluaqqusillata

A handwritten signature in black ink, appearing to read 'Aqqaluaq B. Egede'. The signature is written in a cursive style with some stylized flourishes.

Aqqaluaq B. Egede